

G5-10-005

复丁雨生中丞^①

光绪五年十月二十二日夜

雨生仁弟大人阁下：

十三日复缄到否。旋奉九月二十七日手书，敬悉一切。江南谣传不日出山，乃因为筠仙招隐一言，又复自沮。殆本意不欲出耳，非筠仙能沮之也。充隐既无资本，作幕又无东道，何不投袂而起，共济时艰。从前尚闻都人有谤议者，近则士论翕然推之当守，虚席延盼，致身报国，此其时矣，幸勿宕缓。幼丹筹防之疏，未愜众望，复议西事新约期□而一无办法，闻已置高阁。鄙疏亦近模棱，行知左公筹复，渠倔强之性，必不画诺，但恐贻巨患于他日耳。疏稿及复总署论海防书，抄呈秘鉴。倭人虚骄叵测，居之不疑。格兰忒喻以大义，尚唯唯，去后更无顾忌。无论其不欲派员，即派商亦无转圜之术，照会撤销与否，乃末节也。格君苦劝中国自强，语长心重，无如听之藐藐。鄙意先尽存款购一铁甲，竟动色相争，可为浩叹。前属李丹崖、徐仲虎在英访求，届时续解经费为伊犁赏款所掐，能否无误，殊未可知。倘公早逢节庶有后应，黎召民系前与春帆并保，此次并未下问，工务、船务，似俱外行，若毫而好学，或可精进，比已赴闽否。捐账案内，梁云汉等如与章程相符，自可顶奏，若不合部章，徒费笔墨，望酌办。奏复各稿，未蒙抄寄，或疑敝处有人泄漏，不知迭次手函密件，存置案头，外人无从窥见，或于幕友闲话偶及一二。汝南京都旧识，怜而收之，品学非所契许，顷已委办局差矣。直顺被水十数州县，元气稍有损伤。无米为炊，司空见惯。洪水夷狄，无禹周以匡拯之，可愧滋甚。属寄参茸，苦无佳品。兹托唐景星转寄人参六两，麋、鹿茸各一架，漆封印记奉呈。初三日拟回保垣。复颂起居。不宣。鸿章顿。

G5-10-006

复两江制军沈^②

光绪五年十月二十四日

幼翁仁兄大公祖年大人阁下：

十七日肃复一缄，当已澈览。刘、林诸生至，奉初九日手示，敬聆一切。弟面询诸生，于驾驶、制造秘要探讨无遗。刘、林、魏、陈四生尤为出色，具征造就人才，品评精当，非捐班考官所能及，从此制驶借得门径，不至再入迷途，何幸如之。筱宋已将会衔奏奖折拟送，复请由闽主政。顷又将四生请保花翎一节咨商添

① 原稿无年代，以黎兆棠督办福建船政事在光绪五年，姑置于此。